

Na osnovu člana IV. 4. a) Ustava Bosne i Hercegovine, Parlamentarna skupština Bosne i Hercegovine, na 47. sjednici Predstavničkog doma, održanoj 4. marta 2009. godine, i na 28. sjednici Doma naroda, održanoj 27. aprila 2009. godine, usvojila je

ZAKON

O IZMJENAMA I DOPUNAMA ZAKONA O MINISTARSTVIMA I DRUGIM ORGANIMA UPRAVE BOSNE I HERCEGOVINE

Član 1.

U Zakonu o ministarstvima i drugim organima uprave Bosne i Hercegovine ("Službeni glasnik BiH", br. 5/03, 42/03, 26/04, 42/04, 45/06 i 88/07), u članu 14. stav 1. iza alineje 9. dodaju se nove alineje 10., 11. i 12. koje glase:

"- pružanje podrške policijskim tijelima BiH;

- školovanje i stručno usavršavanje kadrova u skladu s potrebama policijskih tijela BiH i drugih službi i agencija iz oblasti sigurnosti;

- forenzička ispitivanja i vještačenja."

Član 2.

U članu 14. stav 2. mijenja se i glasi:

"U sastavu ovog ministarstva kao upravne organizacije su Direkcija za koordinaciju policijskih tijela BiH (u daljnjem tekstu: Direkcija), Granična policija Bosne i Hercegovine, Državna agencija za istrage i zaštitu, Agencija za forenzička ispitivanja i vještačenja, Agencija za školovanje i stručno usavršavanje kadrova, Agencija za policijsku podršku i Služba za poslove sa strancima, čija se prava, dužnosti i operativna samostalnost uređuju posebnim zakonima."

Član 3.

U članu 14. iza stava 2. dodaje se novi stav 3. koji glasi:

"Ured za saradnju s Interpolom, kao samostalna služba u sastavu ovog ministarstva, prelazi u Direkciju kao sektor za međunarodnu operativnu policijsku saradnju s INTERPOLOM, EUROPOLOM, SECI CENTROM i drugim međunarodnim organizacijama u skladu s važećim sporazumima. Direkcija će, u roku do 90 dana od početka rada, preuzeti poslove, sredstva za rad i zaposlene Ureda za saradnju s Interpolom od Ministarstva sigurnosti."

Član 4.

Ovaj zakon stupa na snagu osmog dana od dana objavljivanja u "Službenom glasniku BiH".